

[Augsburg], 27. Oktober 1567

An Johannes Oporinus

UB Basel, Fr. Gr. I 11, fol. 299r.
Steinmann Nr. 788.

S. Ternis tuis literis vnis 21. Septembris, et binis alteris sine die et Consule datis respondeo. Quòd Willerianis te Isocrates et alias libellos dedisse scribis, habeo gratiam. Sed scito me oὐδὲ γρὺ accepisse. Negant, cum peto, vasculum adiunctum, nec vllum diem dicunt. Vereor, ne sic vlciscantur editionis Isocraticae iniuriam: in qua (verum vt fatear) plures naeuos reperio legens, quam primo aspectu speraram. Quòd si charta grandior adhibita fuisset, elegantius etiam et commodius vno volumine compingi potuisset: ἀλλὰ τὸ γεγενημένον ὀγένητον οὐκ ἀγένοιτο. Sed in grandiore vnà cum commentariolis editione magis aduigilari velim. Non video quid intersit ad vilitatem, si illos in folio minutiore charctere excuderis, vt seorsim vendi possunt (!). Minutos libellos Caesari offerre me pudet. Sed sine patrono eos edi necesse erit. Tantum est τῶν νεοπλούτων huius vrbis non modò fastidium sed etiam odium literarum nostrarum. Vt Caesarem patronum asciscerem persuaderi mihi non alia de causa passus sum, quam vt quibusdam mei contemptoribus medium digitum ostenderem. Eundem patronum magnificio opere honorare valde cupio, qui sordidum libellum tam benignè accepit, vt meas nugas esse aliquid, putare videatur. Sed si aliud tibi visum fuerit: meae priuatae rationes et tuae voluntati et publicae vtilitati cedent. οὐ γὰρ εἰς περιουσίαν πράττεται μοι τὰ τῆς βιβλιογραφίας: quae mihi hactenus ne caereos quidem persoluit. Puer meus Catonis descriptionem nondum absoluit, et sunt mihi omnia relegenda accuratius. Tu cures velim, vt Episcopij sequantur consilium meum, et sic excudant Officia, vt seorsim vendi possint, itemqüe reliqui libelli eodem modo: Singulos enim singulis veteribus amicis inscribere dcreui. Nisi per nostrates mercatores chartas in Officijs excusas accepero: perinde habebo, ac si hac hyeme nihil sit futurum, et ipse mihi parcam. Sin vos calêre animaduertero, torporem et ipse exutiam nec in mora vobis ero: sed vestrum erit, nullos tabellarios huc euntes praetermittere. In caeteris parebo et consilio tuo et exemplum sequar βοείῳ ποδὶ ἐπὶ τὰ Δημοσθένους προσιὼν, si huius anni salebras euassero. Plus enim negocij mihi facessit recognitio quam conscriptio. Cos. ipse ad te scribet. Vale et rescribe. 27. Octobris 1567.

Hiero[nymus] Wolfius
Tuus.